

A Monthly Christian Magazine

AN ORGAN OF THE ZOU PRESBYTERIAN CHURCH SYNOD



Khristian Tangkou

Vol. 52 || No. 12

December, 2016

Christmas Special Issue



Editor: Rev. Tualzachin

Synod Office Telephone No. (03874) 235105

Editorial

Ni leh haa leh kumte hing liem zel in kholum, khovot, damthei, dammaw, hunte pal galkai zou in kum bul a i din lai un tam tan meel mu ding leh tang dinga kinepna (hope) inei lou lai un Mangpa hoina leh mapuina zal in Christmas haa tan ang puitung ban ah ama eite a ding a kingai niem taha mun niem pen a ang pienna champha hunte lawm thei dinga lam-etna lienpi hing neisah tu a vanglien Mangpa min phat kawm in ama thupina pie in amin loup i phat masa uhi.

Tamteng ban ah Ama nna sepkhawmpi Hattuum chinte kung leh mimal chinte kung ah Christmass leh kumtha chibai ka hing buh hi. Tam bang ei Khritian ten nipoimaw (KUT) ineipen Hattuum chin in a manpha thei pen leh aloh thei pen a zang leh mang chiet dingin pawlpi thatangin deisahna sangpen ka hing lan hi. Na bawn un Christmas leh Kumtha chibai! Tukum Jesu pien ding thu leh Ama mizie Isai 9:6 pansan in genlohna thu houlim vai. Ei a dingin nausen khat ang pieng a, tapa khat pieh in i um uhi. Tuachiin ama khu i vaihawmpa uh ang hita ding hi. Ama khu lamdangpa, thumoppa, bangkimbawlthei, Pasian kumtawnpa, Lemna Mang achi ding uh chi ahi.

- 1) Lamdangpa: Lamdangpa ahina khovel a misiem, mipil leh Leengte tanchin leh hinkhuo te pen a tangthute uh aki gen chieng in khatvei khel kingai pei lou hi. Hinanleh Jesu Khantan leh tanchin te pen anai kal amminute in kigen gen leh zong kizachim lou, tul theilou ahimai hi. Khum ma ahi alamdang natah. Etsahnan Mahatma Gandhi tanchin leh tangthu milien milal hinanleh khatvei khel ki ngaipei tuon lou hi. Anina ah

Van mun loupï nuasia a ei mikhiel shi dingte tankhe dinga ahiing kipiehna zong ahi.

- 2) Thumoppa (Councillor) Isai 1:18: Mangpan hichin agen a tunin hing pei un thu kikum khawm va ui. Na khelna uh san-au bangin san nan leh zong keiman vua bangin hing sopsieng vang. Na khelna uh sandup bangin dup nanleh zong keiman Samul puonbang in ka sopsieng ding.
- 3) Bangkim bawlthei Pasian: Mangpa bangkim bawlthei Pasian ahidan pawtdohna i et Israelte Mousi in apuilai in Pasian silbawl theina toh zan in mikuong, Sun in Meilum toh apui hi. Agil kiel ching un neh ding ann apie a, adangtah chieng un donding tui apie hi.
- 4) Kumtawnpa: Hebraite 13:8 Jesu Khrist zanni, tuni leh bangchih tan angai ngai ahi zing hi. Kiheng ngailou, kilamdang ngailou china ahi. Khumpen leengte leeng, kumpite kumpi china ahi.
- 5) Lemna Mang: Isai 9:6 Guolnei Isai in Jesu piending leh Jesu piensan ahi. “Lemna Mang” achi ding uhi chiin gen hi. Na vaihawm, ka vaihawm hun sung i mipite adin lemna tuntu ihi nai....? Awleh mite adia ling (thorn) leh khau bang ihi kha amah? Unau it tunia igen nuom ihin kum upat dungzui in Christmas iman dan/zah dan akibang kim sih ding a, tuni tan i man dante kivel thatha lei dei huoi isa uhi. Nang leh kei inn sung, mimal leh i khotaang ah lemna tuntu ang hi kha nai....? Ki tuoh loute kituohna, kimudate leh ki houtheiloute ki chimat satu hileh ichi ahi. Laphuohtu in Tam nei simlei ah Mang sangza na pieng nan leh hundam dingin koima pieng vawtlou ana chi hil hiel hi.

.....

THU TUOMTUOM leh THUMPI DINGTE



01. Pasion hoina mapuina zal in Zou Synod vaihawmna Year Planner umsa bang in a Hattuum a misiengthou te thumnate Mangpa'n hing dawng in Distrtict lienga mai hilou in Presbytery lieng a kumsim khawmpi umte mang leh zang zou thei a i um theina utoh Mangpa kung a lungdamthu genkawm in Amin loupi phat kawm in pahtawina sangpen ipie uhi.
02. Pasion hoina leh umpina muongkawm in ang tung ding December 01-04, 2016 tan dai in Zou Synod kumsim khawmpi leh a 13vei vaihawmna khawmpi um ding ahia, lawching tah leh lawh taha man/zah ahi theina ding Hattuum chin leh mimal chin in ithumna toh bawzui chiet vai. Amun ding Presbyterian Church Lailam Veng Thupi: "Pasion toh zawhkhawm" (Gen. 5:22).
03. Presbyterian Youth Fellowship (PYF) PCI huopin Presbyterian Church Mawranglang (KJP) Synod Sepngi ah October 21-23, 2016 tan dai in Youth Camp 2016 um a, Youth i/c Rev. Stephen Chinzathang tel in Khanglai lam a mawpuohna neite vaki hel uhi. Theme: "Youth and Accountability" chi ahi. Tahsa, Hagau ah lawchingtah in zang zou thei uhi.

04. Pasion mapui leh umpi zong imai Khristian te a dia nipoimaw pen Christmas Vannei Hundampa hing pienni bang kinai tou ta hi. Zalentah leh nuom taha man leh zah ahitheina din ini chin thumna uah phoh tawntung va ui.
05. PWF 16th Biennial Conference 2016: Pasion hoina leh mapuina toh dated 11-13 November 2016 sung dai in Presbyterian Church Khatla Aizawl ah 16th PWF Biennial Conference um hi. ZPWF apat in palai (delegate) mi-34 bang va kihel thei uhi. Khawmpi thupi “Seek the Lord” (Isai 55:6).
06. Bagalur Upa Tha: Apeisa November 06, 2016 niin a 9veina Zoutang Presbytery (Session) vaihawmna in Moderator Upa Thangchinhang khut zang in Pa Kaiminlun Bagalur Upa hi ding leh a Hattuumte kem ding in Namdetna (Ordination) pieh ahi. Amaban lampeina dingte thumsah vaui.
07. Manipur Public Service Commission (MPSC) saina in Manipur Education Service Grade-III (Assistant Inspector of Schools) Open Competitive examination result November 7, 2016 a puonkhiet in um a, i mi-le-sa Mr. Khaiminlian s/o Upa Nengkhanlian of Lailam Veng leh Esther Chingneikim d/o Upa Dr. M. Lachinkhai of Lailam Veng te’n lohchinna nga uhi. Mr. Khaiminlian khu ST teng lah a rank 1 (one) hipha hi. I lungdampi mama uhi. Mangpa’n loupina tangta hen.

.....

Reports

M.G.P DIAMOND JUBILEE REPORT - 2016

Pasian hoina leh mapuina zal in apeisa November 11, 2016 niin Mangpa'n Manipur Gam Presbytery kum 60 tan meel mu thei a ang pui tungna (60) Diamond Jubilee ZPCS Campus ah Ama phatna leh thupina piehna toh kizang zouta. Tualeh tami hun leh mun chiemtena in Jubilee Suong Moderator Rev. Thangboi Khongsai in Honna leh Latna nei hi. Khum ban ah Dated 11-13. November tan dai in Central Church ah a (61) vei Manipur Gam Presbytery vaihawmna khawmpi leh Ordination Service toh kizang zouta. Khawmpi Thupi: "Kei lampi thutah leh Hinna" (Johan 14:6).

Upa Ordain thate leh a hina munte uh:

1. Upa Liensuonkap - N. Kanaan Veng Church
2. Upa Mangkhanthang - V. Bethel Church
3. Upa Zamzakhup - LDCC Hiengzou Church

Re-Instate thate - 2016

1. Upa Gouzamang - Central Church
2. Upa Pumzadal - LDCC Hiengzou Church
3. Upa Thangzasuon - N. Kanaan Veng Church

* Amaban mawpuohnate uh asep piching zou chiet na ding un thumna toh panla vaui.

I M M A N U E L

(Isai 7:14; Matthiu 1:22-23)

- Rev. Hangpi Manlun

1. Thupatna.

Aw leh amasapen in Pasian mapuina toh kum 2016, Khrismas lamdawntheita ding a hinna damna hingpetu ibieh Pasian min iphat masa uhi. Tutung in “Immanuel” chi tungton in ikikum ding uhi. Tualeh i Bible uah tami thuteng khu thum vei atuong hi. (Isai 7:14; 8:8: Matt.1;3). Tualeh Hebrai ham a geldan ah “Immanuel” chi ahi. Greek ham in Thuhunlui a lekhieh masapen Septuagint-ah ahileh, “Emmanuel” chin akigel hi. Tami bang in Mathiu geltu khun, “Emmanuel” chin ang gel hi. Abangteng hijong leh abulpatna “I ahisih leh E” akipan khu aumzie kibang ahituohtuoh gel hi. Tami Immanuel chi thu imumasahna uh ahileh Jawlnei Isai in Jesu pien masang lai kum 700-velin Jesu min ding a anamaget min ahi.(Isai 7:14; 8:8). Tualeh Mangpa Jesu ang pien ding la in Angelin Mari kung ah Jesu min ding in ang gen kia hi. Amin umzie ahileh “Pasian i kung uah aum” china ahi. Tualeh Bible a min kiphuohte khun meaning anei chiet ua, tuabang in Jesu min kigen khat khu tami ‘Immanuel’ ahi. Bible hilchientu loupitah Dummelow in, “Min ahina a, tittle ahizaw hi” ana chi hi. Tuazieh in Jawlnei Isai in amin ding in Emmanuel na hisah ding uh chia anamagen khu Mangpa Jesu hina toh jong akituoh mama hi. Van Mang tapa, mihing a ahingpien thute, mihingte lah a Pasian hing umdante genchetna ding in Immanuel chia anaphuoh khu adih mama hi.

2. Tuin Pasian in lampi tuomtuom a mihingte ang umpi dante isuiding uhi.

- 2.i). Eden huon ah Pasianin amisiem masapen Adam leh Evite akoiin ana umkhawmpi jing hi. Ahin, Adam leh Eviten Pasian thupieh nuolin anapalsatua

nehlou ding singga anehtah ziehun Pasian toh umkhawmtheitalouin Eden huon akipatin nawmang/hawlmangin ana umta uhi. Ahin Pasian in Abraham toh thuhun (covenant) aneipi a, tuachin tami thuhun azui chiengun Pasian toh ana kipawl thei uhi.

2.ii). Tualeh Pasian khu Mosi kung akipuon lain jong, “A umpa kahi” chin akigen hi. Pasian in Mosi kungah, “Tualeh munsienghou hingbawl pieh uheh, alahua ka ten theina ding in” (Potdawnha 25:8) achi hi. Tuachin tami munsienghou tungtonin amite lah a umta hi.

2.iii). Tualeh Israelte lengte khang/hunlai ah jong amite lah ah ana umthu jong imu uhi. Tambang in Thuhunlui hunin ami Israelte toh ana um dan imu uhi.

3. Awle tuin Pasian ikungua aumdan isui ding uhi.

3.i). Johanin achilin thu aum a, thu khu Pasian toh aum a, thu khu Pasian ahithu agen hi. Tami thu khu i Mangpa Jesu genna ahi a, achil akipat a Pasian toh umkhawm a, eite khelna leh gitlouna akipat ahingtan ding ahing pieng ahi. (Johan 1:1-14). Tuachin mihing lim-le-mel puoin tami leitung ah kum sawmthum-le-thum ang um hi.

3.ii). Sawltah Paulin jong Mangpa Jesu khu Pasian hingal,

mihingte tan ding a suoh bang a hing pieng ahithu agen hi. (Philippi 2:6-8).

3.iii). Tualeh van akatou nuain jong leitung aumlai agen bangin Hagau Siengthou in Pentecost nin leitung ah ang kum suh a, tuni dongin gingtute leh hattuumte ahing umpi in ang hamuon jing hi.

3.iv). Tualeh Kihilna ah, “Kei Alpha leh Omega ka hi. Mangpa Pasian aum lel, umkhinsa leh hing umdingpa” chin jong akigen hi. (Kihilna 1:8). Amakhu bang chilaipou in jong aum jingpa ahi hi.

4. Ei mimal leh innsungte ang umpidan sui kia va-ui.

Tam atung a igente ban uah Mangpan eima mimal chiet leh i innsung chiette uh ang umpidan leh puihuaidan ingaitua leh siltamtah imuchiet ngei ding uhi. Tumasang kum sawmni leh sawmthum lai a na mimal hindan leh na innsung umdante nua etkia lechin Mangpa hingpui dan leh guojawl dante lamdang tah in na mungei ding hi. Laphuohtu in, “Aw Mangpa kei koi ka hia, ka innsung mite jong bang ahia tamtantan a nangguoljawl”

chia a kipah seng a bieng a luonhi luong akap atamta hi. Tamte ingaitua chieng in Sam gieltu gen bang in “Mangpan saltangte Zion a ahing nuo puikia lain, mang mantute bang ihi uhi,” achi khu idinmun uh ang hiphialta hi. Halehluiah Mangpa loupina tangta hen! Tamte khu Mangpa umpina leh puina jiehbou ahi hi. Tuaziehin imimal hinkhuo, i innsung mama uah jong Pasian umpina nasatah itan ziehun aminloupi iphat sonson uhi. Tualeh amadeibang a hinkhuo izahtou jel ua ikalsuon jing nahpou uh leh Mang Immanuel in imimal hinkhuo leh innsungte uh tusang a thupijaw in ang umpi in angpui ngei ding chi ipuong ngam uhi. Tuabang muthei leh tangthei ngei ding in thumna toh panla jing va-ui.

5. Kum tawn kum tawn in Mangpa khu ikung uah um jingta hen aw.

Awle imanghilou ding khat uh ahileh Mangpa khu tu idamsung maimai ua ikung ua um ding ahisih a, ama gingta a hinna neite khu ashinua chieng un jong kumtawn kumtawn a Mangpa kung a khawldam dingte jong ihi uhi. Tuaziehin tam leitung idam sung ua Mangpa ikung ua aumlou a, eite jong Mangpa toh i umkhawm jing sih uh leh na shijou chiengin na hagau Mangpa kung ah akhawl dam sih ding hi. Tuaziehin unau ittah aw tu na damsung ngeiin Immanuel toh zawhkhawm, vahkhawm jing ding in ikingen sonson uhi. Tuabang hileh tam na leitung khuoljinna na jaw chieng in na hagau khu i Emmanuel kung ah a khawl damta ding hi. Mangpa’n simtu zousie hing umpi in hing guoljawl jingta hen. Amen!!!.

KHRISTMAS CHIBAI BUHDIN KISA VAI

- Upa Khupsuankham

A NING ning ah mun tuomtuom ah miten ang tung ding kum 2016 AD “Khristmas” chibai sawm in bawldan chituomtuom puohkhiet asawm uh chi imuthei uhi. Tuate khu bang ahiei ichileh excursion, tour a man sawm a um ua, kiteng ding, nausuoh ding (tanei) zunehnopna chibang in 2016 “Khristmas” chibai ding a kiguonggal sawm bang a um ua, Catholic Parish (Hagau) lam sienthoua toh 2016 “Khristmas” chibai asawm uhi. Nungah-tangvalten ahileh kihelna hun lemtang a mang ding in aki singsa uhi. Tualeh Historical event a mansawm zong um uh chizong ithei uhi.

Eiten vang tuabang a man ding hun pen pammai isa uhi (I Cor. 10:31) ah tambang in agen hi. “Na bawl tapou, naneh zong na dawn zong Pasian loupina ding in bawl in” chi imu hi. Eiten kum 2016 i chibai danding ua ideipen ahileh (Kihilna 22:20) a Mangpa Jesun hingpei juoiding hitang achilai in hingpei maitan Mangpa Jesu chia mou leh hagau in (Mou/Hattuom) ana chibai bang in Amen! hing pei in, kum 2016 AD “Khristmas” Nangma melmu zaljou in Mangpa Jesu deilam bawlina in kangmang ding hi chin Mangpa hatnan (Strength) masot in tami kum 2016 Khristmas khu chibai vai. Mangpa deilam khu bang atadieile? (John 4:34) ah Mangpa Jesun agen a, “Kei eisawlpa deidan zui a kasepdia eipieh nasep zawsiang khu ka-ann ahi” ana chihiel hi. Asepdia (Apa) Mangpa Pasian in apieh khu John 6:39 ah imu uhi. Kei eisawlpa deilam ahileh kei eipiehsa jousie khatzong mansuolou a, ninukhia chieng a kakaithaw ding ahi, ajiehpen tapa muzousien Ama agintat ua, kumtawn hinna anei theina ding un chi khu kapa deilam ahi.

Mangpa deilam bawl kisintoujel ding in angdei hi (Ephe. 3:10). Kum 2016 Khristmas khu

sillamding khat hing um ding a gintatna nei gige a, lungmuongmaw a um umlou in, Mangpa deilam habawl kum hiding in chibai vai. Hun leh kum ihabawl dingte khu

- > Khosahna hasa deudeupen bangbawllel apathele diei?
- > Khovel hunsie lungjin umtah Mangpa toh bangchi mankhawm thei ding?
- > Mangpa a silpieh ipiehna leh sillat a dihtat zawhsawm vai.
- > Innsah-innhang, lawm-le-guol leh guol-le-paai tung leh sillei leh zua thu a dihtatzawh sawm gige vai.

Thumna neitam in Mangpa houpi gige a, angtung ding 2016 Khristmas chibai (welcome) zing vai. Mangpa Jesu hagau in mitoh ang kilemsah a, tuajieh in i Mangpa Jesu hingpien ding khu ittna leh kingainiemna toh Khristmas chibai ding kisa vai. Laphuotu khat in.

*“Aw Mangpa Jesu hing pei in,
Nangdin mun kalungsung ah a um;
Aw Mangpa Jesu hingpei nawven,
Nangdin mun kalung sung ah a-um”*
Chikawm in hing pieng ding Mangpa Jesu welcome sawm vai.

Mangpa Jesu pienlai in Aahsi zattuom kilamdingtah khat

a-um a, Bethlehem lam ngakawm in Suolam Aahsi mizousie Bethelhem lam a puitu ahidan gen vai. Tam Aahsi khu Aahsi kidangtah ahia, mit a mu leh pulam a kilang thei ahisih hi. Nauseen umna tunglaitah imutheina ding in ngiemnou khat a pei a Hagau mit a chibai (welcome) theina ding in kiletsahna panglou, kingaangiemna leh Bethlehem lam ngavai in, mipilte Puitu Aahsi khu ichibai thei ding uhi. Judaten tam Aahsi khu “Aahsi Neelkaai” achi ua, ipu-ipaten zong ana chi uhi. Tam Aahsi khu Mangpa Jesu gingtallouten amu theisih uhi. Tam Suolam Aahsi loungal a muthei sih uhi. Tam Suolam Aahsi loungal

Aahsi dang a um sih a, pulam mit leh tahsa mit a muthei ahisih a, lungsim leh Hagau mit a muthei giep ahia, Hagau mit a muloute a ding in “Khristmas” khu umzebei ahi. Tam Aahsi imutheina ding in lungsim a Mangpa Jesu ngaldot zing a, lungsim dawngkot honsa in koi ulei I Mangpa Jesu hing pieng ding khu chibai thei (welcome) thei bep ding uhi.

Ang tung ding I Mangpa Jesu Khrist hing pienhun hingtung ding ahia, I lungsim Bawnginn kotkhah uh honsa a koi in, kingaangiemna toh (kum 2016 Khristmas) chibai ding in kisavai, i-uunaunu uh Mari bang in, Mangpa’n hing guoljawl taken.

PICHINLAM MANAW VA UI

(Heb. 6:1; Phil. 3:12-14)

- Pastor Awnkhankhup

Piching ahilouleh Pichinna chi thu Bible a imu dan ah - mailamnaw, Khanglien, Phahchientung, Kitoudel, Midangte a ding a hinna chite in ana kigen hi. Gingu hinkhuo pichinna leh khanletna in Hattuum gam leh nam hinkhuo a pichinna ahuom hi. Atangpi a gen in Pasian leh Hattuum ading a zattah, mi gin-um leh piching genna ahizaw deu ding hi.

1. Hagau lam a naupang hinkhuo: Masawn theilou leh pichin lam manaw theilou chi khu sil poitah ahia, ahing (piengsah) tu nu leh pa a ding in zong lung zinhui tah ahi zel hi. Sawltah Paul in zong “Nouma a Khrist

siempiching a aum masangsie nausuoh natvei in ka hing vei kia hi” ana chi hi (Gal. 4:19). Tuamabangin Korinth khuo a Hattuumte zong piching nailou uh sa in, ann gum nethei nailou leh nawitui a vah ngai lai naupang bang in a gen a, a tahsa mit nahlai dan uh theisiem in thu a hil hi (I Kor. 3:1-3).

Naupang khothei nailou in adudu agen a, sil hoi leh deihuoi amu zousie ama a ding hisah a kah mai bangin tulai gingu te leh Hattuumte zong naupan vai tah in ki um thei zel hi. Tuabang naupang in musauna leh theisiemna neilou ahi man in, adei leh a ngaite a ngetmai mai zong hunsah lou in, ‘tu mama in, kinaw ve, ka du vele’ achi mai hi. Ama van neite leh midangte a zong khenkah thei selou in, mi naute vanhoi khat amu khah leh a tawi khah taphot, tanden ut, innlam a tawi a peipi sawm mai zel te ahi uhi. Tuama bangin, gingu hagau lam a naupang khenkhat ten zong Hattuum sung a a dei tapou uh mawpuohna leh satan (Porfolio) hoi leh deihuoi teng

tan det sawm pawl zong ki um nalai hi.

Hasatna leh gimna thuoh ding a um chieng a taise ngal zel, hasietna ding maimai sui a phunphun mai, kitawp ding pou a mi vauvau mai i chite Hagau lam naupanna chiemtena khat ahi kia hi. Amin uh akilaw khahlou chieng a nuahpai pai, asephoi sun te uh suong den mai, akigen khah nawn lou chieng ua alungkimlou hizel maite milungsiet huoi penpente ahi uh ichi thei ding hi.

2. Pulam muthei a khanna: Hattuum member lam leh silpieh lam a khanna ban ah Biehinn Building leh Hattuum neitah (Property) lam a khannate zong sil dei um tah leh nuom thu gengen na ding a kilawm khanna khat ahi. Hattuum Upa leh lamkai kisiemkhienna leh kipuihuoina lam a masawn leh khanna zong khu sil dei umtah ahi kia hi.
3. Mutheilou - hagau lam a khanna:
 - a) Ginna leh Pasian theina lam ah (Eph. 4:11-13): Pulam muthei a khanna mai ah Pasian

a lungkimsih chithei in, Jesu Khrist ginna leh ama theichien semsem na ah masawn i tum zel ding uhi. Thei leh bukim kisa napi, alelam a Pasian mit mu a genthei, hepihuoi, tasam, mittaw leh guohtang hikhah ding azauhuoi hi. Sawltah Paul in tahsa dan a suon ding ahau dan gen kawm in, tuate zousie ‘Khrist Jesu ka Mangpa theina hoitah zieh n, sil zousie supna in ka sim a, Ama zieh in sil zousie ka taan ta’ ana chi ngam hi (Phil. 3:8). A nuom leh a lawphuoi lam silte mai hilou in, Khrist zieh a thuoh leh taan ngam ding, thamlou a apoimaw hun a muolphou ngam ding in pichinlam i naw ding uhi.

- b) Kipumkihatna lam a pichinna ah (Eph. 4:11-13): Thupilte 6:16-19 sung a Pasian in ahuot leh kidahhuoi asah sil sagi umte lah a khat khu Unau lah a kituolouna piengsah mite ahi. India sum a tuong humpi luthum nei Ashoka Chakra kichi i mu ngai chiet dingua, mun khat a ding khawm chiet napi a ngatna lam uh a tuom chiet bang in, ei gingtute zong Biehinn sung a toukhawm,

laa sakhawm leh thumkhawm napi i lungsim leh ideidan tuomchiet in, ngatna lam kibang theilou a i um zel uh zumhuoi mama hi. I Mangpa Jesu mama in zong Pharisaite kung ah, “Leenggam chinteng a aki langkhen a, ama leh ama a kidou leh a mangthai ding a, tualeh khopi chinteng ahisih leh innsung chin teng a kilangkhen a akidou uleh a ding zou sih ding hi”, ana chi hi (Mt. 12:25).

- c) Jesu bahnna lam a pichinna: Sawltah Paul in Phillipi mite kung ah, “Khrist Jesu a zong um tam lungsim khu noute ah zong um heh” ana chi hi (Phil. 2:5). Khrist a um lungsim khu bang tobang lungsim a ta diei le?

Kingaingingiemna - Pastor khat in a Hattuum etkolte a kiem zelzel zieh in Pastor Senior khat ava dong a, Pastor Senior pa’n ‘Na biel mite lah a Pasian belguot leh thaunu bangzat ama khat um ahi chi na thei ei?’ ana chi hi. Tuachiin Pastorpa in zong a biel mite manphat dan theisiem kawm leh kingai ngiemna hinkhuo toh nna ahing sep chieng in abiel miten Pastorpa a ngaina mama ta ua, Hattuum hing haltha in a hing

pung tou zel ta aki chi hi. Kingai ngiemna toh nasem te koipou in ki it in kingaina chiet a, zong kizui thei ahi china ahimai hi. Tana bang in Khrist lungsim zel tha tha va ui.

Thumanna - Khrist khu hing kikoi ngiem in, suoh bang in hing um a, shitan dong in thu ahing mang a, Kross a shina nangawn ahingthuoh

chi i thei uhi. Tuaziehin gingu mimal leh Hattuum ten thuman zil va ui. 'Hattuum aw khu Pasian aw ahia, khawmpi aw zong Pasian aw ahi' kchi kawm zel in pichin lam nawsawm vai. Mimal khat leh Local khat hoisah dan mai tudet teentun lou in, Pasian leh pawlpi hoisah leh a deidan sui in pichin sawm va ui.

THUMPI DIA NGETNA

Khrist a Unaupih Nu leh Pa, U leh Naute aw,

Peithei lou leh khuo zathei lou in hun sawttah kana um a, dam ding ka ut seng jiehin Old Bazar a Homeopathic khat etkolna nuoiah hathum val damdawi kana ne hi. Damdawite ahat thei seng jiehin kasung in zoulou in kasung anat law banah kagil hing puoh thei jel banah kasung hing tangthei jel hi. Kachi zong hing kisat guithei jel a, ka sungna adam nadingin Homeopathic damdawi nekia nanleng kadampi zou dieh sih hi. Ka sunglam buoi huoi deudeu thei dinga ginmawna kanei jiehi leh kituohpi vawtlou hi a kaki thei jiehin Homeopathic damdawi neh ka tawpsan ta hi.

Nu leh Pa, U leh Naute aw, kakeng lam leh ka khojah lounate kadam siengzou sih lezong kasung beh a dam siengthei na dingin i biehi Pa Pasian kungah lungsiattah a hing na thumpi dingin kang ngen hi.

Ngentu,
Sd/- Tv. Chinkhanlal
New Lamka (G)

KHRISTIAN INNKUON

Text Genesis 18:19; Ephesa 5:22; Exodus 20:12.

- Stephen Khupsianlal, B.D

Khristian Hattuum kichi khu Khristian innkuon hoitah umlou in adingthei sih hi. Khristian innkuon khu nampi a dingin kipsahtu/detsahtu leh khantouna umthei nading a chi/salt khu ahi. Khristian innkuon khu kizilsahna mun poimawtah ahia, khum innkuon ah nu leh pate khu Khristian ki itna in akankhawm ua, tua leh nau te khu Pasion thu hoitah a hil a um in tualeh Mangpa Jesu khu innsung a lienpen pen/ thunei pen a koina leh innkuon sunga mite'n Mangpa biehpiehna, innsung maicham hoitah siemna innsung khu ahi.

Khristian innkuon akhun innsungmite'n nasep silbawl dan kizilsah in, kimawl hun, thumna neidan leh maban ding ngaituo khawmna khu ahi. Khristian innkuon khu innsungmite'n khat leh khat kizatattuo ding dan, ginumna, hoina leh kipanpi tuo dan zilkhawmna mun khu ahi. tam Khristian innkuon ah khun Mangpa Jesu hoina vahasah in um a, mikhuol/zinte hoitah a bawldan siemin khum innkuon akhun Pasion giing Pa, Pasion giing Nu leh Pasion giing Ta leh Naute a um uhi. Genesis 18:19, "Aziehpen aman anua a, atate leh a innkuonpite thu apeding a, Mangpa'n Abraham tungtanga a

thugen a tangtun theina ding in, dihtah leh khentuum neilou a, vaihawm dingin Mangpa lampi zui va uh chi ka thei hi," achi hi. Mangpa Pasion in Abraham in a innkuonte a etkol dan ah lawching ahidan athei zieh in mawpuohna leinpi guon pan zaw hi.

1. PASIAN GIING PA

Pasion in Pasal khu innkuon sunga lu/head pen in koi hi. Genesis 18:19 akhun Abraham in a innkuonte thupiehna nei hi. Ephesa 5:23, "Aziehpen Khrist khu Ama ngel tahsa pumpi, Hattuum lutang leh hundampa ahimabangin, pasal khu zi lutang ahi hi".

Tam khu Pasian deidan ahia, alelam/reverse a umna khun Pasian deidan bawtsie hi. Hitananleh zi khu apasal in suoh/ slave bawl a abawl ding china ahikhalou hi. Ji khu a pasal a ding in panpitu ahia, pasal pang/ nahgu apat a siem ahizie in pasal lutung ah a umthei sih a, pasal keng nuoi ah zong a umsih hi. Tuazieh in pangkhawm ding leh akisimmaw tuomding koima a umsih hi. Ji itding khu pasal mawpuohna ahi. Ephesa 5:25, “Pasalte aw, Khrist in Hattuum a it a, ataang ua akipieh angin, nouten zong na jite uh it un”. It un chikhun zabawl na mai hilou in, dammaw-veisiet hunte ah, chimaw-genthe hun ah leh hausat-nopsah hun a itdan kibang a itding china hizaw hi (I Korinth 13).

Pasal mawpuohna khu a ji in lungkham, mangbat atuoh hun a ahenem ding ahi. I Samuel 1:8, “Tuachi’n apasal Elkanah in akung ah “Hannah bang dinga kap kap nahiei? Bang dinga ann nelou nahiei? Bang ding a na lungtang dasah nahiei? Tapa sawm sang in zong nanga dingin

kahoi zaw sih amah?” achi hi. Sep leh bawlding silte ah pasal in azi toh ngaidan akupkhawm ding ahi. Kitenna tungtawn in nupa te khu pumkhat-sakhat a um ahi zieh un (Genesis 31:16). Khristian innkuon a Pa khun Jesu Khrist khu ahinkhuo a akoi masatpen ding ahi.

Aji a it na sang in Jesu Khrist a itna khu aletsah zawh ding ahi. Khristian innkuon sunga Pa pen khu siempu mawpuohna nei ahi. Tuazieh innsung maitam siem in mawpuohna alah ding ahi. Thumna/thungetna toh kisai in mawpuohna lienpi anei hi. Job khun a innkuonpita a ding in maicham hoitah in siem zel hi Job 1:5.

2. PASIAN GIING NU

Khovel ah khun atangpi in Pa lawching kichite khu a pasal itdan siem/Pasian ji/ji kipumpieh nei khate ahileng uh kichi h i. Jite mawpuohna mansapen khu Jesu Khrist itding leh Ama naseppieh ding khu ahi. Luk 14:26. Anina ah jite mawpuohna khu a pasal thu amanding ahi. Ephesa 5:22, “Jite aw Mangpa kunga na kituhlut

bangun nouma pasalte kungah kitu lut un”.

Sarah khu ettontah mama Nu ahi. I Peter 3:6 akhu, “Sarah in Abraham khu Mangpa chia han a athu aman bangin; noute zong zauna mawngmawng giinglou a silhoi nabawlwleh Sarah tanute na hi uhi”. Tulai khovel changkangnna gam ah tam khu jite a ding in sil hamsa bangin kilang nanleh Pasian deibang a ji in apasal thu aman lou leh kipahna hinkhuo anei thei ngaisih ding hi. I Timothi 2:11-15,” ... Pasal tunga thu anei zong kaphal sih hi. “Genesis 3:16,” na lunggul na pasal thu hivan in, aman na tungah thu anei ngitnget ding hi”. A pasal khu ginglou/non-believer ahikhahtahleh ji khun innsung ah a pasal zabawl kawm in Hagau lam Nu mawpuohna alah ding ahi. Pasian deibang a Khristian innkuon akhun ji leh Pasal te’n Jesu Khrist thupina apekhawm uhi.

Jite khun apasalte uh a zatat ding uh leh athu uh aman ding mai uh hilou in a itding uh ahi. Tita 2:4-5. “Tuachia amauten nupi

khanglaite, apasalte it ding leh atate uh it dinga athuhil theina ding un, kidehthei, telelou, innsung nasem mi, mi navah, apasalte uh thu manga um ding leh Pasian thu kigente gensiet a aum louna dinga, thu ahil theina ding un”. Ji khun kichei uong ahiei silmantam toh kizep chite achiin lou ding ahi. “Tuamabangin numei ten zong, puonsil kilawmhun leh zumthei leh umdan siem in kizem u’henlen, sam suhkiil ahiei, sana ahiei, tuikepsuong ahiei leh, sil mantam a kizem lou in, hinanleh numei Pasian ngaisah kichite akilawm hun giapin nasep hoi toh kizem u’leh kadei hi”. I Timothi 2:9-10. Tualeh I Peter 3:4-5 akhun, “Mihing lungtang akiphuol lungsim kingaangiemna leh nunnemna puonsil setheilou hi leh, tua khu Pasian mitmu in amanpha mama hi.

Ji manpha leh Nu manpha kichite khu Pasian silpieh loupitah ahi. Amaute khu apasalte uh leh atate ua ding in guolzawlina thupitah ahi uhi, “Amanu’n adamsungin a pasal adingin, aselam hilou ahoilam nna aseppieh ding hi. “Thupilte 31:12. “Atate ahing

thou ua, amanu khu hamphanu achi uhi; tualeh apasal inzong amanu hamphanu chi'n apahtawi hi," Thupilte 31:28.

3. PASIAN GIING NU LEH PA

Nu leh pate khun ta leh naute khu Pasian apat gou manpha ahidan a theisiem mama ding uh poimaw hi. Nu leh pate khun ta leh naute khu a itding uh ahi. Khum ata leh naute uh khu aneu lai ua pat Pasian lampi a apuihuoi ding uh poimaw mama hi. Mathiu 19:13-14. "Naupang apeina ding lampi ah chil in, a upat dongin zong tuate akipat in apeimang sih ding hi. "Thupilte 22:6. Nu leh pate'n it a i ta leh naute uh Nipi sangin/ Sunday School leh biehin te ah aneu uapat hoitah in ipuilut na uoi?.

Innsung ah taleh naute khu Bible a tangthu umte hilding khu silpoimaw mama ahi. Tualeh innsung kikhop hunte ah thumna neisah/Bible simсах etc te ah mawpuohna pieh a kizilsah khu silhoi mama ahi. Deuteronomy 32:46 akhun, "Tunia nakung ua ka hing thu theisahte ah na

lungtanguh koi kip unlen, tam danthu zousie pilvang tah a zui ding in na tate uh thu pie un," chi hi. Atate a etkaw! zawlou ziehin Eli khu gawtin um hi.

Nu leh pate'n taleh naute silpoimaw te guonding mawpuohna nei hi neh leh tah sil leh ten leh siemzilna lam leh Pasian deibang a hinkhuo azahthei nading un (I Timothi 5:8). Tualeh taleh naute khu suhlungthah louding ahi. Ephesa 6:4. Nupa khenkhat akiahau khah chieng un atate uh tungah khut hakha zel zong ki umthei ding hi. Tambang khu sildih ou ahi. Nu leh pate'n tate ading a Pasian kunga thu ngetpieh ding leh hundamna aneitheina ding ua thumsah dingban ah khelna apat asuotat theina ding ua zong thumsah zing ding ahi uhi.

4. PASIAN GIING TATE

Exodus 20:12, "Na nu leh na pa zatat in; Mangpa na Pasian in ahing pieh gam a na damsung nite asawt thei na ding in, "Isaak khu a etton tah mama mai hi. Maicham a latding sing apuoh lai in phuntam sese lou in thumang tah in apa

nung azui hai. Apa Abraham khu khumhun lai in ana tehta mama a, Isaak khu utleh taimang theitham ding hi. Nanleh thumanna khu adeitel zaw a, Mangpa'n nasatah in aguolzawl ahi (Genesis 22). Tuabangin Samuel zong khu a etton tah mama mai a, Mangpa Jesu'n zong nu leh pa thumanna hinkhuo hoitah ana zan ghi. Luk 2:51.

Khristian innkuon lawchinna thuguh khu innsung maicham kisiemna leh Jesu Khrist khu innsung a thuneipen a koina khu ahi. Lawchinna thuguh nina khu

innkuon ki itna ahi.

Khristian innkuon ihina uah Lai siengthou genbang in Zite, Pasalte leh Tate'n Pasian deibangin hinkhuo izang na uoi? I Khristian mawpuohna chiet uh ihinpi lou zieh un innsung tampite ah kisiet-kibalna, kikhenna, kituohlouna, ki-itlouna etc te'n vaihawm lengzel hi. Innsung nuomkhu Vangam naipen ahi chi theizing in eimau deidan hizawlou in i Mangpa deidan in pan latha chiet vaui.

Mangpa'n hing guolzawl hen.

PATRON MEMBER THA

Pasian lungsietna toh Khristian Tangkou ngainatu kibelap in Upa Lunchinthang, Lailam veng Paton Member in ahing pang hi. mangpan loupina tang taken.

THEISAHNA

Issue kia chieng apat in khochin Khristian Tangkou Subscriber List abu sung ah hing kizep ding ahita a, Agent-ten tua toh kituoh a, ana hawm zel ding in i kingen uhi.



Ordained Suunna

UPA SUANKHANKHUP - 41 TANCHIN TOMKIM

Upa Suankhankhup Samte S/o (L) Hausuankham Samte leh Nu (L) Donhoiching te tapa tahpen ahi. Ama Dt. 10-06-1775 in Kuvan vangkhua ah apieng a, pienpi unau pasal-1 leh Numei -6 anei hi. Tualeh kum 1997 January in a it aji Mrs. Vungngai toh kiteeng in Pasian pieh goutan ta pasal 4 leh numei 2 anei uhi.

Tualeh, Kum 2005 in Hattuum Upa ding in telching in ang um a, tuazou 2006 khawmpi L. Gangpimual khuo ah Rev. Khamchinkhai khutnuoi apat in Upa Ordained ana tang hi. Hun hing peitou jel in tukum 2016 kumbul lam in a sin liver hing naa in Phaipi (Imphal) Hospital ah thumvei jen etkol in ana um hi. Alivei na ding in Doctor te'n a sin chauh hilou in a kal zong buoise gopta chiin innlam ah ang nuo sawlta hi.

Tuachiin innlam a etkol theitan a etkol ahi nua in mihing deeiina leh lunggul bang zou nonlou in vangsiet huoitah in dt. 30-10-2016 (Sunday) Zan 11:09 pm in a itt-angai, aji, ata, ule-nau leh Hattuumte nuasie in ang muolliem san ta hi. Tam i Khristian Tangkou tungtawn in ama i it thu leh i suun thu ipuong uhi.



Ordained Suunna

UPA HAUKHANSUAN - 64 TANCHIN TOMKIM

Upa Haukhansuan ahileh Pu (L) Awnzakham leh Pi Dimnien te tapa tahpen ahia, kum 1952 in Buhsau khuo ah ana pieng hi. Kum 1976 in a ji ittah Upanu Mankhannieng toh ana kiteng hi. Kum 1999 in Presbyterian Church, Tuibuang ah Upa Nengdou khut ah Upa Ordination anatang hi. Ama pienpi sanggam Pasal - 2 leh Numei - 4 tualeh ta Pasal - 1 leh Numei - 5 anei hi. Atute Numei -8 leh Pasal -2 ahi. Ama ahileh Buhsau Hattuum ah Upa telching a na um in, kum tamtah Hattuumte na mapui in, Local Chairman leh Secretary chite napuo in Hattuumte tahsa leh Hagau ah ana mapui hi. Buhsau khuo a zong kum tampi Mantri in ana pang a, khosung a zong muon leh son pen zong ana hi zing hi. Tuachin neh-le-tah suina nopzawhna ding chiin New Zoveng ah hing pumlut a, Hattuumte toh tomkhat kithuo zou in, natna giltah, Cancer natna nei ahilam Imphal a Zatoute apat theikhiet ahia, hun bangtan ahei khat athuohzou in dated 30th October, 2016 ni in ana asep Pasian sienglam a hing zawtsan ta hi. Tam i Khristian Tangkou tungton in ama iit thu leh i suun thu ipuong uhi.



Ordained Suunna

UPA LIANSUANPAU BAITE - 65 TANCHIN TOMKIM

Upa Liansuanpau Baite khu Pu (L) Chinzatun leh Pi (L) Vungkhochiin Baite-te tapa thumna ahia, 14th June 1951 in Panglian khuo, Singngat Sub-Division ah a pieng hi.

1953 in Khianglam khuo ah pmlut in tuana pat in khangkhie in MYCA/ZSP chite ah kihal tou den hi. 14th June 1969 in Assam Regiment ah lut in Happy Valley, Singllong-7 (ARC) ah Training zou in 5th Assam regiment ah joining bawl hi.

11th April 1971 in apu (L) Douchinkham, Chief of Kullian tanu Miss Nuamkhoniang toh pu-pa dan in ana kiteng uhi.

3rd December to 17th December 1971 India leh Pakistan kidoupina ah Jamu & Kasmir Shamba Sector ah 191 Infantry Briged nuoi ah 5th Bn Assam Regt. tel in kikaptuona ah shi leh liem tampite lah ah Pasian zal in damtah in suohta hi.

1976 kum in Hattuum sung buoina zieh in Zomun ah pmlut kia uhi. 1978 October in kum kuo (9) val Sepoy apan nua in Medical Board Pension in hing tawp hi.

29th December 1980 in Loktak Project mun ah Sepna mu in tuanah sem kia hi. Asepna mun Loktak Project ah 1997-2005 (kum 8) vel Hattuum (International Denominational Church) enkoltu in pang hi. Hattuum pawl 21 val umna ahia, tuanah IEM leh FMPB ah Missionary Local in achawm ua, Ama leh a innkuonten zong FMPB ah 2001 January apat a sepna uh tawp kuon tan MGP tungtawn in Missionary chawm uhi.

Tuachiin 30th June 2011 in a sepnate Pasion zal a zou thei in Retired in ang pawt theita hi. A sepyo pan apat kum 42 sung Govt. nna sem hi.

2012 in Mission veng, Lamka ah aji-le-ta leh tute toh teng in khosa ua, Tanu-4, Tupa-6 leh Tunu-4 anei hi. Tuachiin Zomi Colony Hattuum ahing kipie in Upa in kizang a, tu ashi tan dong Zomi Colony Presbyterian mi-le-sa ahi.

Hattuum lam ah District lieng, Presbytery lieng leh Synod lieng ah Committee poimawtahtahte ah ana pang a, kum 1994 in Manipur Gam Presbytery 38th Session, Zomi Colony ah MGP Moderator Upa Ngulzakham khut ah Zoomun Hattuum enkol ding in Hattuum Upa in namdetna ana tang hi. Loktak a a sepn mun ah zong Hattuum ah Chairman hina sawttah ana tu a, tuaban ah tu a a umna Zomi Colony Hattuum ah zong Building Chairman in tu ashi tan ana pang hi. Missionary nasepna a lunglut mama a, ama innsung tanpha in Missionary ana chawm ua, tamte zieh in pasian in a innsung taisan ngailou in lamdangtah in a tawisang hi. Thugen thei mi zong ahi.

A kum a sim damlou a, Delhi leh mun tuomtuom a damna ngai a etkol ahi nua in November 20, 2016 (06:30pm) vel in thupina gam ahing zot santa hi. Ama i it thu leh i suun thu tam i Khristian Tangkou tungtawn in i puong uhi.

.....

TUNNU LIMBEL PANPINA PETE:

(22nd October, 2016 to 17th November, 2016 tan)

1. Nu Dimneiching Central Church	Rs.	1,000
2. Lamka District, Tunnu Limbel tuohkhawm	Rs.	925
3. PWF, PYF & District Pate (Gunpang District) Tunnu Limbel tuohkhawm	Rs.	1,015
4. Nu Niangenngai, Behiangjang	Rs.	1,000
5. PWF Tuivai District Tunnu Limbel tuohkhawm	Rs.	375
6. Nh. Chingnejem, Zomi Colony	Rs.	200
7. Nu Niangkhanching & Family, Delhi	Rs.	2,000
8. PWF Lentang District Tunnu Limbel tuohkhawm	Rs.	941
9. Pi Phalnem, Tuilaphai	Rs.	200
10. PWF Sugnu, Anntang taang	Rs.	1,600
11. Tv. Khupmuanlal, Nungshai	Rs.	200
12. Lamneihoi, Lailamveng	Rs.	100

Khristian Tangkou | December | 2016

13. Nh. Nemkhoniang, Lailamveng	Rs.	500
14. Chiinnei, Lailamveng	Rs.	500
15. Nh. Dimneihau, Tomgdam	Rs.	1,000
16. Nu Chingmuankim, Tongdam	Rs.	100
17. Evan. Goukhogin, Emmanuel	Rs.	100
18. Pa Ginminlun, Thingkangphai	Rs.	2,000
19. MGP Session Khawmpi tuohkhawm	Rs.	620
20. PWF T.Talnuam apat Anntang	Kg	20
21. Nu Dimzaching Central Church	Rs.	500
22. Pa H. Kapneithang & Family, Central Church	Rs.	3,000
23. Chinhoinuam, Kananveng	Rs.	500
24. Mangkhanvung, Kananveng	Rs.	100
25. Mandeingai, Kananveng	Rs.	300
26. Ngaihoinuam, Kananveng	Rs.	200
27. Dimlamnuam, Kananveng	Rs.	500
28. Chingzahat, Kananveng	Rs.	100
29. Lunngaiching, Kananveng	Rs.	100
30. Lianzalam, Kananveng	Rs.	300
31. Nuamneichiin, Kananveng	Rs.	200
32. Chingnuamniang, Kananveng	Rs.	500
33. Goukhanlam, Kananveng	Rs.	500
34. Niangbiaklian, Central Church	Rs.	3,000
35. PWF Singngat District tuohkhawm	Rs.	725
36. Zotang Presbytery tuohkhawm	Rs.	896
37. PWF Tuibuong, Anntang	Kg	107
& Christmas gift	Rs.	1,000
38. Mrs. Mapuii, Delhi	Rs.	3,000
39. Mission Board Zomi Colony, Christmas gift	Rs.	3,000
40. Nh. Nianglamching, Awnchinkap khuo	Rs.	50
41. Nh. Mangnianching, Awnchinkap khuo	Rs.	50
42. Nh. Niangdeinuam, Awnchinkap khuo	Rs.	50
43. Nh. Vungdeiniang, Awnchinkap khuo	Rs.	100
44. Albert Samte, Awnchinkap khuo	Rs.	70
45. Nh. Ngaimuanching, Awnchinkap khuo	Rs.	20
46. Tv. S. Lianzathang, Awnchinkap khuo	Rs.	100

2016 | December | Khristian Tangkou

47. M.Thang, Awnchinkap khuo	Rs.	100
48. Nu Ngaihoiching, Awnchinkap khuo	Rs.	200
49. Nu Luanzaniang, Awnchinkap khuo	Rs.	20
50. Linda Manlun, Awnchinkap khuo	Rs.	20
51. Lamneikim, Awnchinkap khuo	Rs.	100
52. Neiching, Awnchinkap khuo	Rs.	100
53. Nu Dimneilam, Awnchinkap khuo	Rs.	100
54. Upa Dongzapau, Awnchinkap khuo	Rs.	500
55. Pa Sianmuanthang, Awnchinkap khuo	Rs.	500
56. Tv. T. Hauminlun, Awnchinkap khuo	Rs.	50
57. Naunu Nianhoikim, Awnchinkap khuo	Rs.	50
58. Chingmuanniang, Awnchinkap khuo	Rs.	10
59. Pa Douzahau, Awnchinkap khuo	Rs.	500
60. Nh. Hatneilam, Awnchinkap khuo	Rs.	50
61. Chingngaikim, Awnchinkap khuo	Rs.	500
62. Pa Paukhogin, Awnchinkap khuo	Rs.	100
63. Nimuan, Awnchinkap khuo	Rs.	20
64. Upa Lianminthang, Awnchinkap khuo	Rs.	1,000
65. Nu M. Niangngaiching, Zomi Colony apat kangkal	Pcs.	2
66. Upa Chinkhanpau of Tangpijol apat kangkal	Pcs.	3
67. PWF Teisaljang apat Anntang	Kg-	45
68. Tuivai Dist. tuokhawm	Rs.	961

Suhdihna (ZPWF Column-November issue, 2016)

1. Tv. Kamminthang, Professor kichipen *Asst. Professor* ding hizaw
2. Pu S.K Mang & Family, Delhi kichipen *Pu S.K Mung* ding hizaw
3. Pu Khakhai Zou, Delhi Rs. 500 kichipen *Rs. 5,000* hizaw ding hi

***Tunnu Limbel Phungvuo nading a hunpeisa leh tutnitan a panpina hing pete tungah ZPWF in kipahtu gen ahia, tuoban ah District PWF chin in Second Saturday thumkhawmna a ithumpi zing ding uh ahi.*

***Petu tengteng Mangpa'n hing mapui zing taken !
Adihloute Office a suhdih theizing ahi.***



Undelivered

Please return to:

The Editor

KHRISTIAN TANGKOU
ZPCS Office, Zomi Colony
Churachandpur - 795 128
P.O. Box - 48, Manipur, India
e-mail:zpcs@rediffmail.com/zousynod05@gmail.com

7a,

Edited and Published by the Editor on behalf of the Zou Presbyterian Church Synod